

大清仁宗睿皇帝實錄

大清仁宗受天興運敷化綏猷崇文經武孝恭
勤儉端敏英哲睿皇帝實錄卷之五

監修總裁官經筵日講起居注官太子太傅武英殿大學士文淵閣領閣事稽察欽奉上諭事件處管理工部事務翰林院掌院學士總帶

加二級尋常加四級臣曹振鏞總裁官太子太保文淵閣大學士管理刑部事務加五級臣戴均元經筵日講起居注官太子少保內大臣文淵

閣提舉閣事稽察欽奉上諭事件處協辦大學士戶部尚書翰林院掌院學士教習庶吉士總管內務府大臣鑲黃旗滿洲都統步

軍統領管理戶部三庫奏宸苑清漪園等處總理工程處御茶膳房御藥房太醫院西洋堂事務軍功加三級隨帶加二級尋常加三級紀錄于

一次臣英和經筵講官太子太保禮部尚書工部尚書行走武英殿總裁管理園子監事務加六級隨帶加二級紀錄四次臣汪廷珍等奉

敕修

嘉慶元年丙辰五月乙巳朔諭軍機大臣等

此次惠齡等帶領官兵分投直撲天井湖等處雖未能將賊匪痛殲而三路賊卡俱已攻克所辦尚好至所請山西兵二千催令赴楚一節此項兵丁已據景安奏分撥防勦惠齡處兵力不敷莫若令恒瑞文圖帶兵先助惠齡將灌灣腦之賊悉力攻圍擒拏賊首為是至施南府屬之恩施縣有賊屯聚經知縣尹英圖等率領鄉勇分路擒捕殲斃多賊洗蕩賊巢知縣尹英圖著以同知升補其經歷蔣

遇春及把總外委等俱著酌量升用以示獎勵至豫省近楚邊界多有教匪景安當駐劄南陽新野一帶督率彈壓不必深入楚境慶成富成會合永保鄂輝即速將襄樊一帶賊匪勦淨再來鳳賊匪在茶園溪一帶屯聚為數甚多孫士毅現兵無多不可存欲速之見輕於深入若能將茶園溪一帶賊匪先行勦除固屬甚善但須悉心籌酌如兵力不敷不妨畧為停待將此各傳諭知之○以奪獲天

井湖青龍溪鄧家畝三處賊卡功賞總兵官
富志那侍衛關騰巴圖魯名號道員先福副
將張持叅將程鵬翼守備林朝輔花翎候補
守備鄧興相等藍翎副前鋒叅領塔思哈等
升用有差○丙午諭內閣據蘊端多爾濟奏
稱土謝圖汗部落之副盟長扎薩克親王齊
巴克多爾濟管理商上事務之扎薩克公拉
素龍多爾濟車臣汗部落之扎薩克親王達
爾瑪錫哩叅贊扎薩克公袞布扎布等懇請

於本年七月前來避暑山莊瞻觀由彼隨扈
進哨効力等語。齊巴克多爾濟等所請雖出
誠悃。但伊等俱係辦理部落事務之人。若俱
令前來。則該部落辦事乏人。著交蘊端多爾
濟等。於伊等每部落內酌令一人前來。此次
祇令扎薩克親王齊巴克多爾濟達爾瑪錫
哩二人。於七月下旬前來。扎薩克公拉素龍
多爾濟。袞布扎布俱著留辦部落事務。○諭
軍機大臣等。永保等所奏不必以先到之兵。

零星輕試一俟兵力齊集商同並進所見甚是。邪教匪徒藉端煽惑四路迫脅蟻聚日多。若零星打仗設官兵稍有損挫不免氣餒賊勢轉張。今永保明亮已抵襄陽並知會恒瑞即帶所有之兵前赴襄陽而慶成富成德齡等帶領直隸山東山西兵亦由豫境前進至文圖。昨令前赴惠齡處協同勦賊。今仍著恒瑞等酌量情形如惠齡處可無須文圖急於前往即令該署鎮帶兵先赴襄陽會合攻勦。

恒瑞永保於官兵齊集後務須先將賊匪奔竄之路豫行堵截其漢江沿岸一帶尤須嚴密防範將船隻先行提集不使賊匪得以偷渡南竄景安在豫境更當實力堵剿俾其無路可逃再行約期並進四面兜擒不可專攻一處致賊乘閒奔竄總之襄陽迤北一帶賊匪勦淨則聲勢聯絡自北而南當陽宜都一帶自必勢如破竹又聞賊匪狡獪往往將被擄脅從之人迫令在前櫻鋒此等愚民被賊

擄掠既為之驅使服役。妻女並被姦淫。及至抗拒官兵。又復為之衝鋒就死。實屬可憫。恒瑞等可先為曉諭。以爾等本係良民。與其為賊虐使。又復驅令當先。致被官兵殲戮。曷若幫助官兵。反戈相向。攻殺賊匪。不但免罪。且可邀功報仇。如此明白宣諭。即不能盡行聽從。亦可解散賊黨。於勦捕機宜。較為事半功倍。將此各傳諭知之。○丁未。奉旨。祭孝誠仁皇后忌辰。遣官祭。

景陵○授一甲一名進士趙文楷為翰林院修
撰二名進士汪守和三名進士帥承瀛為翰
林院編修○戊申諭內閣前因察哈爾額魯
特每次來京引見人員往往有出痘者朕甚
憐憫因降旨令赴熱河引見今據保寧等奏
稱若令該員等進嘉峪關沿邊行走此一帶
仍係內地亦與伊等無益所奏尚是即著照
保寧所奏嗣後未出痘之察哈爾額魯特人
員俱令由科布多烏里雅蘇台多倫諾爾一

路前赴熱河引見以示體恤○引見新科進士得旨一甲三名趙文楷汪守和帥承瀛業經授職外戴殿泗李錫恭王鼎吳邦慶張錦枝許應喈陸以莊黃焜望秦淵趙慎畛汪德鉞靳文銳邱勲沈學厚陳蘭疇蔡維鈺陸泌石時榘那爾豐阿韓克均李可端李華庭邱立和劉澤嚴烺著改為翰林院庶吉士慕鰲趙麟陳鶴黃躍之龔麗正張文靖李培元林紹光李林松吳應咸史祐鹿維基祁墳楊健

劉名載袁樹。鄭鵬程。周宏綱。王敬之。周泰元。
成格。程體常。扎蘭泰。劉玉湛。劉嶺。徐維城。張
大維。胡萬青。著分部學習。吳光悅。韓掄衡。周
之域。董彩鳳。桂齡。蔡炯。顏允燦。許庭椿。李于
培。王恩注。俞日烜。蕭德充。姚學埭。楊中龍。姚
達。楊廷琮。譚元。程俊。丁玉燾。董義。何允徽。珠
隆阿。曾寶光。蔡毓琳。常泰。覺羅清昌。著以內
閣中書用。黎承惠。曹松篁。鄂山。靳金鼎。來珩。
崔本。譚兆燕。徐雲龍。著以知縣即用。胡本淵。

郎汝琛。萬世發。陳毓咸。賈名伸。程健學。辛紹業。楊尚琳。譚景韓。郭龍光。著以國子監學正學錄用。餘著歸班銓選。○己酉。命大學士和坤。工部尚書彭元瑞。教習庶吉士。○調不諳水師之廣東左翼鎮總兵官西密揚阿。為雷瓊鎮陸路總兵官。雷瓊鎮陸路總兵官徐忠。為左翼鎮總兵官。○庚戌。諭軍機大臣等。福康安。和琳。攻克火麻營一帶險要山梁。距平隴更近。此時賊匪緊要屏障。俱經官兵乘勝

占奪。而石三保、石柳鄧、吳廷禮等首惡俱聚
集平隴。正可悉數生擒。一舉蕲功。事機順利。
佇待捷音速至。吳隴登投出時。已有旨令福
康安等酌賞翎頂。今吳隴登又往約鴨保寨
苗衆三百餘人。幫同官兵打仗出力。尚屬實
心効順。福康安、和琳如接奉前旨。已賞給六
品頂帶藍翎。此次再加賞五品頂帶花翎。並
發去大小荷包。傳旨賞給。伊自加倍感激。而
其餘各苗匪。見吳隴登投出之後。如此榮耀。

必更有臨陣紛紛乞降者。於勦捕尤為有益。至摺內所稱首逆等聚集平隴。如巢穴一破。必向乾州竄匿。現由平隴後山併力攻圍。另出奇兵直趨乾州。為一鼓掃蕩之計。甚合機宜。若前次進勦時早計及此。歲事豈不更為迅速耶。將此諭令知之。○以勦火麻營等處苗寨功。賞把總楊坤玉等藍翎。瓦寺土舍索諾木文錦。巴圖魯名號。並花翎。土守備朗爾結等藍翎。○緩徵河南承辦兵差之唐淅川。

桐柏。內鄉。南陽。鎮平。泌陽。裕葉。南召。舞陽。河
內。武陟。安陽。湯陰。淇。汲。新鄉。獲嘉。考城。滎澤。
鄭。新鄭。蘭陽。祥符。尉氏。洧川。許。長葛。襄城。臨
潁。鄆城。西平。遂平。確山。信陽。三十六州縣。新
舊額賦。○辛亥。諭內閣。宜綿奏。臯蘭等州縣
平原地畝。及高阜之處。田禾日見黃萎等語。
甘肅土性高燥。本年春夏之間。雨澤短少。以
致夏田無望。糧價增貴。朕心深為軫念。著將
臯蘭等州縣缺雨地方。或借給口糧。或開倉。

平糶再加恩將本年應徵錢糧概行緩徵以紓民力。○諭軍機大臣等甘省地土瘠薄前因小民口食維艱恐借糶緩徵亦未能周普曾降旨以甘省距口外不遠莫若勸令貧民出口覓食如實在無力者或地方官量為協助俾得就食豐區亦豫為籌辦之一法該督自己酌量情形遵照辦理如貧民俱情願出口得以謀食營生固屬甚善儻累於室家妻子安土重遷亦應聽其自便不可令地方官